

Gorchymyn drafft a osodwyd gerbron Senedd Cymru o dan adran 74(5) o Fesur Plant a Theuluoedd (Cymru) 2010, i'w gymeradwyo drwy benderfyniad gan Senedd Cymru.

OFFERYNNAU STATUDOL
CYMRU DRAFFT

2026 Rhif (Cy.)

**GOFAL CYMDEITHASOL,
CYMRU**

**PLANT A PHOBL IFANC,
CYMRU**

**Gorchymyn Eithriadau Gwarchod
Plant a Gofal Dydd (Cymru) 2026**

NODYN ESBONIADOL

(Nid yw'r nodyn hwn yn rhan o'r Gorchymyn)

Mae'r Gorchymyn hwn wedi ei wneud o dan Ran 2 o Fesur Plant a Theuluoedd (Cymru) 2010 ("y Mesur"), ac mae'n dirymu ac yn disodli Gorchymyn Eithriadau Gwarchod Plant a Gofal Dydd (Cymru) 2010 (O.S. 2010/2839) ("Gorchymyn 2010").

Mae Rhan 2 o'r Mesur yn darparu ar gyfer cofrestru ac arolygu gwarchodwyr plant a darparwyr gofal dydd yng Nghymru gan Weinidogion Cymru.

Mae adrannau 21(1) a 23(1) o'r Mesur yn ei gwneud yn ofynnol i warchodwr plant a pherson sy'n darparu gofal dydd i blant gofrestru gyda Gweinidogion Cymru. Mae adran 19(2) o'r Mesur yn datgan bod person yn "gwarchod plant" os yw'r person hwnnw yn gofalu am blentyn neu blant o dan 12 oed mewn mangre ddomestig er mwyn gwobr. Mae adran 19(3) o'r Mesur yn datgan bod person yn darparu "gofal dydd i blant" os yw'r person yn darparu gofal ar unrhyw adeg i blant o dan 12 oed mewn mangre heblaw mangre ddomestig.

Mae'n drosedd o dan adran 21(5) o'r Mesur i berson weithredu fel gwarchodwr plant heb iddo gael ei gofrestru'n warchodwr plant gan Weinidogion Cymru. Mae adran 23(2) o'r Mesur yn ei gwneud yn drosedd i

berson ddarparu gofal dydd heb iddo gael ei gofrestru gan Weinidogion Cymru i ddarparu gofal dydd.

Mae'r Gorchymyn hwn yn nodi eithriadau i'r hyn a olygir wrth "gwarchod plant" a "gofal dydd i blant" at ddibenion Rhan 2 o'r Mesur. Mae'r Gorchymyn wedi ei wneud yn unol â phwerau a roddir i Weinidogion Cymru yn adran 19(4) a (5) o'r Mesur i bennu amgylchiadau pan fo person y byddai ei weithgareddau fel arall yn gyfystyr â "gwarchod plant" neu "darparu gofal dydd" wedi ei eithrio rhag y gofyniad i gofrestru.

Mae Rhan 1 o'r Gorchymyn hwn yn cynnwys diffiniadau o dermau penodol a ddefnyddir yn y Gorchymyn.

Mae Rhan 2 yn nodi gwahanol amgylchiadau pan na fo person yn "gwarchod plant" at ddibenion Rhan 2 o'r Mesur. Pan fo unrhyw un neu ragor o'r amgylchiadau a nodir yn Rhan 2 o'r Gorchymyn yn gymwys, nid yw'n ofynnol i berson gofrestru'n warchodwr plant gyda Gweinidogion Cymru.

Mae Rhan 3 yn nodi'r amgylchiadau pan na fo person yn darparu "gofal dydd" at ddibenion Rhan 2 o'r Mesur. Pan fo unrhyw un neu ragor o'r amgylchiadau a nodir yn Rhan 3 o'r Gorchymyn yn gymwys, nid yw'n ofynnol i berson gofrestru'n ddarparwr gofal dydd gyda Gweinidogion Cymru.

Mae Rhan 4 yn dirymu Gorchymyn 2010, ac yn gwneud darpariaeth ar gyfer trefniadau trosiannol.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Gorchymyn hwn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Gorchymyn hwn. Gellir cael copi oddi wrth: Yr Adran Iechyd a Gwasanaethau Cymdeithasol, Llywodraeth Cymru, Parc Cathays, Caerdydd, CF10 3NQ ac mae wedi ei gyhoeddi ar www.llyw.cymru.

Gorchymyn drafft a osodwyd gerbron Senedd Cymru o dan adran 74(5) o Fesur Plant a Theuluoedd (Cymru) 2010, i'w gymeradwyo drwy benderfyniad gan Senedd Cymru.

O F F E R Y N N A U S T A T U D O L
C Y M R U D R A F F T

2026 Rhif (Cy.)

**GOFAL CYMDEITHASOL,
CYMRU**

**PLANT A PHOBL IFANC,
CYMRU**

**Gorchymyn Eithriadau Gwarchod
Plant a Gofal Dydd (Cymru) 2026**

<i>Gwnaed</i>	***
<i>Gosodwyd gerbron Senedd Cymru</i>	***
<i>Yn dod i rym</i>	***

Mae Gweinidogion Cymru yn gwneud y Gorchymyn a ganlyn drwy arfer y pwerau a roddir gan adrannau 19(4) a (5) a 74(2) o Fesur Plant a Theuluoedd (Cymru) 2010(1) (“y Mesur”).

Gosodwyd drafft o’r Gorchymyn hwn gerbron Senedd Cymru(2) o dan adran 74(5) o’r Mesur ac fe’i cymeradwywyd ganddi drwy benderfyniad.

(1) 2010 mccc 1.
(2) Mae cyfeiriadau yn y Mesur at “Cynulliad Cenedlaethol Cymru” bellach yn cael effaith fel cyfeiriadau at Senedd Cymru yn rhinwedd adran 150A(2) o Ddeddf Llywodraeth Cymru 2006 (p. 32).

RHAN 1

Rhagarweiniol

Enwi a chychwyn

1.—(1) Enw'r Gorchymyn hwn yw Gorchymyn Eithriadau Gwarchod Plant a Gofal Dydd (Cymru) 2026.

(2) Daw'r Gorchymyn hwn i rym ar ***.

Dehongli

2. Yn y Gorchymyn hwn—

ystyr “awdurdod lleol” (“*local authority*”) yw cyngor sir neu gyngor bwrdeistref sirol yng Nghymru;

ystyr “Bwrdd Iechyd Lleol” (“*Local Health Board*”) yw Bwrdd Iechyd Lleol a sefydlwyd o dan adran 11 o Ddeddf y Gwasanaeth Iechyd Gwladol (Cymru) 2006(1);

mae i “cyfrifoldeb rhiant” yr ystyr a roddir i “parental responsibility” yn adran 3 o Ddeddf Plant 1989(2);

ystyr “Deddf 2014” (“*the 2014 Act*”) yw Deddf Gwasanaethau Cymdeithasol a Llesiant (Cymru) 2014(3);

ystyr “Deddf 2016” (“*the 2016 Act*”) yw Deddf Rheoleiddio ac Arolygu Gofal Cymdeithasol (Cymru) 2016(4);

mae i “gwasanaeth cymorth cartref” (“*domiciliary support service*”) yr ystyr a roddir gan baragraff 8 o Atodlen 1 i Ddeddf 2016;

mae “mangre” (“*premises*”) yn cynnwys unrhyw le ac unrhyw gerbyd;

ystyr “mangre ddomestig” (“*domestic premises*”) yw unrhyw fangre sy'n cael ei defnyddio'n gyfan gwbl neu'n bennaf fel annedd breifat;

ystyr “y Mesur” (“*the Measure*”) yw Mesur Plant a Theuluoedd (Cymru) 2010;

ystyr “perthynas” (“*relative*”), mewn perthynas â pherson, yw llys-riant, tad-cu/taid neu fam-gu/nain, brawd, chwaer, ewythr, modryb, neu gefnder cyfan neu gyfnither gyfan (gan gynnwys unrhyw berson sydd yn y berthynas honno yn rhinwedd priodas neu bartneriaeth sifil neu berthynas deuluol barhaus);

(1) 2006 (p. 42).

(2) 1989 (p. 41).

(3) 2014 dccc 4.

(4) 2016 dccc 2.

mae “rhiant” (“*parent*”) yn cynnwys unrhyw berson sydd â chyfrifoldeb rhiant dros blentyn neu sydd â gofal am blentyn;

ystyr “wedi ei gyflogi” (“*employed*”) yw wedi ei gyflogi naill ai o dan gontract cyflogaeth neu o dan gontract am wasanaethau.

RHAN 2

Eithriadau o ran gwarchod plant

Eithriad o ran cofrestru

3. Mae erthyglau 4 i 9 o’r Gorchymyn hwn yn pennu’r amgylchiadau pan na fo’n ofynnol i berson sy’n darparu gofal i blentyn o dan 12 oed mewn mangre ddomestig er mwyn gwobr gofrestru’n warchodwr plant at ddibenion Rhan 2 o’r Mesur.

Darpariaeth â therfyn amser

4.—(1) Nid yw person sy’n gofalu am blentyn yn gweithredu fel gwarchodwr plant pan fo’r person hwnnw yn gofalu am blentyn am—

- (a) un cyfnod o 2 awr neu lai, neu
- (b) cyfnodau sy’n dod i gyfanswm o 2 awr neu lai,

y dydd.

(2) Nid yw paragraff (1) yn gymwys i ddarparwr sydd wedi ei gofrestru’n warchodwr plant o dan Ran 2 o’r Mesur ond y mae ei gofrestriad wedi ei atal dros dro o dan reoliad 40(1) o Reoliadau Gwarchod Plant a Gofal Dydd (Cymru) 2010(1).

Prif ofalwyr, perthnasau a phersonau sy’n cyd-fyw

5.—(1) Nid yw person sy’n gofalu am blentyn yn gweithredu fel gwarchodwr plant os yw’r person hwnnw—

- (a) yn rhiant i’r plentyn;
- (b) yn berthynas i’r plentyn;
- (c) yn ofalwr maeth ar gyfer y plentyn;
- (d) yn byw ar yr un aelwyd â’r plentyn.

(2) Nid yw’r eithriad yn yr erthygl hon yn gymwys pan fo person sy’n dod o fewn paragraff (1)(b) neu (d)—

- (a) yn gofalu am y plentyn mewn mangre heblaw cartref y plentyn, a

(1) O.S. 2010/2574 (Cy. 214).

- (b) yn bwriadu gofalu am blant eraill nad ydynt yn perthyn i'r person hwnnw ac nad ydynt yn byw ar ei aelwyd.

(3) Yn yr erthygl hon, mae “gofalwr maeth” yn cynnwys person—

- (a) y mae awdurdod lleol wedi lleoli plentyn gydag ef yn unol â Rheoliadau Cynllunio Gofal, Lleoli ac Adolygu Achosion (Cymru) 2015(1);
- (b) sydd wedi ei gymeradwyo'n rhiant maeth yn unol â rheoliad 8 o Reoliadau Paneli Maethu (Sefydlu a Swyddogaethau) (Cymru) 2018(2);
- (c) sy'n maethu plentyn yn breifat, o fewn ystyr “to foster a child privately” yn adran 66 o Ddeddf Plant 1989.

Darparu gofal yng nghartref y plentyn drwy gytundeb rhieni

6.—(1) Nid yw person yn gweithredu fel gwarchodwr plant pan fo'r person hwnnw—

- (a) yn gofalu am—
 - (i) plentyn neu blant i'r rhieni (“y rhieni cyntaf”) yn gyfan gwbl neu'n bennaf yng nghartref y rhieni cyntaf, neu
 - (ii) plentyn neu blant i'r rheini cyntaf ac, yn ychwanegol, am blentyn neu blant i rieni gwahanol (“yr ail rieni”), yn gyfan gwbl neu'n bennaf yng nghartref y rhieni cyntaf neu'r ail rieni neu yn y ddau gartref, a
- (b) yn gwneud y trefniadau i'r plentyn neu'r plant gael gofal o dan gytundeb â rhieni'r plentyn neu'r plant.

(2) Yn yr erthygl hon, mae “cytundeb” yn cynnwys contract cyflogaeth neu gontract am wasanaethau, pa un ai ar lafar neu'n ysgrifenedig.

Darparu gofal arall yng nghartref y plentyn

7.—(1) Nid yw person yn gweithredu fel gwarchodwr plant pan fo'r person hwnnw yn gofalu am blentyn yn rhan o weithgareddau gwasanaeth cymorth cartref a ddarperir i'r plentyn neu i ofalwr y plentyn—

- (a) o dan Ran 4 o Ddeddf 2014, a
- (b) o dan drefniadau a wneir—
 - (i) gan riant y plentyn;
 - (ii) gan neu ar ran awdurdod lleol;
 - (iii) gan neu ar ran Bwrdd Iechyd Lleol.

(1) O.S. 2015/1818 (Cy. 261).
(2) O.S. 2018/1333 (Cy. 260).

(2) Mae paragraff (1) yn gymwys pa un a yw'r gofal yn cael ei ddarparu gan ddarparwr y gwasanaeth cymorth cartref yn uniongyrchol neu gan berson sydd wedi ei gyflogi ar ran y darparwr.

(3) Yn yr erthygl hon, mae i "gofalwr" yr ystyr a roddir gan adran 3 o Ddeddf 2014.

Darparu gofal yng nghwrs cyfeillgarwch

8.—(1) Nid yw person yn gweithredu fel gwarchodwr plant pan fo'r person hwnnw yn gofalu am blentyn yng nghwrs cyfeillgarwch â rhiant y plentyn hwnnw a phan na fo unrhyw daliad yn cael ei wneud.

(2) Yn yr erthygl hon, ystyr "taliad" yw taliad o arian neu gyfwerth ariannol ond nid yw'n cynnwys darparu nwyddau neu wasanaethau.

Cynorthwywyr gwarchod plant

9. Nid yw person yn gweithredu fel gwarchodwr plant pan fo'r person hwnnw wedi ei gyflogi i ofalu am blant neu pan fo'r person hwnnw yn gweithio fel arall o dan gyfarwyddyd a rheolaeth gwarchodwr plant sydd wedi ei gofrestru gan Weinidogion Cymru o dan Ran 2 o'r Mesur.

RHAN 3

Eithriadau o ran gofal dydd i blant

Eithriad o ran cofrestru

10. Mae erthyglau 11 i 20 o'r Gorchymyn hwn yn pennu'r amgylchiadau pan na fo'n ofynnol i berson sy'n darparu gofal i blentyn o dan 12 oed mewn mangre heblaw mangre ddomestig gofrestru i ddarparu gofal dydd at ddibenion Rhan 2 o'r Mesur.

Darpariaeth â therfyn amser

11.—(1) Nid yw person yn darparu gofal dydd pan fo'r person yn darparu gofal i blentyn am—

- (a) un cyfnod o 2 awr neu lai, neu
- (b) cyfnodau sy'n dod i gyfanswm o 2 awr neu lai,

y dydd.

(2) Nid yw paragraff (1) yn gymwys i berson sydd wedi ei gofrestru'n ddarparwr gofal dydd o dan Ran 2 o'r Mesur ond y mae ei gofrestriad wedi ei atal dros dro o dan reoliad 40(1) o Reoliadau Gwarchod Plant a Gofal Dydd (Cymru) 2010.

Darparu gofal yn achlysurol

12. Nid yw person yn darparu gofal dydd—

- (a) pan fo'r person yn darparu gofal i blentyn mewn mangre benodol am 5 niwrnod neu lai mewn unrhyw flwyddyn galendr, a
- (b) pan fo'r person wedi hysbysu Gweinidogion Cymru yn ysgrifenedig cyn yr achlysur cyntaf y defnyddir y fangre o dan sylw yn y flwyddyn honno.

Darparu gofal drwy gytundeb rhieni

13.—(1) Nid yw person yn darparu gofal dydd pan fo'r person—

- (a) yn darparu gofal i—
 - (i) plentyn neu blant i rieni (“y rhieni cyntaf”) mewn mangre annomestig a enwebwyd gan y rhieni cyntaf, neu
 - (ii) plentyn neu blant i'r rhieni cyntaf ac, yn ychwanegol, i blentyn neu blant i rieni gwahanol (“yr ail rieni”) mewn mangre annomestig a enwebwyd gan y rhieni cyntaf a'r ail rieni, a
- (b) yn gwneud y trefniadau i'r plentyn neu'r plant gael gofal o dan gytundeb â rhieni'r plentyn neu'r plant.

(2) Yn yr erthygl hon, mae “cytundeb” yn cynnwys contract cyflogaeth neu gontract am wasanaethau, pa un ai ar lafar neu'n ysgrifenedig.

Darparu gofal mewn gwasanaethau llety rheoleiddiedig eraill

14.—(1) Nid yw person yn darparu gofal dydd pan fo'r person yn darparu gofal i blentyn—

- (a) yn rhan o wasanaeth cartref gofal mewn man sydd wedi ei gofrestru i ddarparu'r gwasanaeth hwnnw o dan Ran 1 o Ddeddf 2016⁽¹⁾,
- (b) yn rhan o wasanaeth canolfan breswyl i deuluoedd mewn man sydd wedi ei gofrestru i ddarparu'r gwasanaeth hwnnw o dan Ran 1 o Ddeddf 2016,
- (c) yn rhan o wasanaeth llety diogel mewn man sydd wedi ei gofrestru i ddarparu'r gwasanaeth hwnnw o dan Ran 1 o Ddeddf 2016,
- (d) yn rhan o wasanaeth preswyl ysgol arbennig mewn man sydd wedi ei gofrestru i ddarparu'r

(1) 2016 decc 2.

gwasanaeth hwnnw o dan Ran 1 o Ddeddf 2016,

(e) mewn ysbyty fel claf,

a phan fo'r gofal yn cael ei ddarparu yn rhan o brif weithgaredd y sefydliad o dan sylw.

(2) Mae paragraff (1) yn gymwys pa un a yw'r gofal yn cael ei ddarparu gan ddarparwr y sefydliad yn uniongyrchol neu gan berson sydd wedi ei gyflogi ar ran y darparwr.

(3) Yn yr erthygl hon—

mae i “gwasanaeth canolfan breswyl i deuluoedd” (“*residential family centre service*”) yr ystyr a roddir gan baragraff 3 o Atodlen 1 i Ddeddf 2016;

mae i “gwasanaeth cartref gofal” (“*care home service*”) yr ystyr a roddir gan baragraff 1 o Atodlen 1 i Ddeddf 2016;

mae i “gwasanaeth llety diogel” (“*secure accommodation service*”) yr ystyr a roddir gan baragraff 2 o Atodlen 1 i Ddeddf 2016;

mae i “gwasanaeth preswyl ysgol arbennig” (“*special school residential service*”) yr ystyr a roddir yn rheoliad 2 o Reoliadau Gwasanaethau Rheoleiddiedig (Gwasanaethau Preswyl Ysgolion Arbennig) (Cymru) 2023⁽¹⁾.

Darparu gofal gan ddarparwr gwasanaeth cymorth cartref

15.—(1) Nid yw person yn darparu gofal dydd pan fo'r person yn gofalu am blentyn yn rhan o weithgareddau gwasanaeth cymorth cartref a ddarperir i'r plentyn neu i ofalwr y plentyn—

(a) o dan Ran 4 o Ddeddf 2014, a

(b) o dan drefniadau a wneir—

(i) gan riant y plentyn;

(ii) gan neu ar ran awdurdod lleol;

(iii) gan neu ar ran Bwrdd Iechyd Lleol.

(2) Mae paragraff (1) yn gymwys pa un a yw'r gofal yn cael ei ddarparu gan ddarparwr y gwasanaeth cymorth cartref yn uniongyrchol neu gan berson sydd wedi ei gyflogi ar ran y darparwr.

(3) Yn yr erthygl hon, mae i “gofalwr” yr ystyr a roddir gan adran 3 o Ddeddf 2014.

Darparu gofal mewn ysgol

16.—(1) Nid yw person yn darparu gofal dydd pan fo'r person yn darparu gofal mewn ysgol i blentyn sydd wedi

(1) O.S. 2023/1327 (Cy. 238).

cyrraedd 3 oed a phan fo'r gofal a ddarperir yn gysylltiedig â darparu addysg.

(2) Yn yr erthygl hon, ystyr “ysgol” yw—

- (i) ysgol a gynhelir o fewn ystyr “maintained school” yn adran 39 o Ddeddf Addysg 2002(1), neu
- (ii) ysgol annibynnol.

Darparu coetsio neu ddysgu

17.—(1) Nid yw person yn darparu gofal dydd pan fo'r person yn darparu coetsio neu ddysgu i blentyn mewn gweithgaredd o fath a restrir ym mharagraff (3), a phan fo unrhyw ofal a ddarperir yn gysylltiedig â darparu'r coetsio neu'r dysgu hwnnw.

(2) Mae'r eithriad yn yr erthygl hon yn gymwys, o ran y plentyn—

- (a) pan fo wedi cyrraedd 5 oed;
 - (b) pan na fo wedi cyrraedd 5 oed eto a phan fo ei riant yn dod gydag ef os yw'n bresennol am fwy na 2 awr y dydd.
- (3) Y mathau o weithgareddau yw—
- (a) chwaraeon;
 - (b) y celfyddydau mynegiannol a'r celfyddydau creadigol;
 - (c) cymorth addysgol (gan gynnwys cymorth yn y meysydd dysgu a phrofiad hynny a nodir yn adran 3(1) o Ddeddf Cwricwlwm ac Asesu (Cymru) 2021)(2);
 - (d) astudiaethau crefyddol neu ddiwylliannol.

Gwasanaethau ieuenctid

18.—(1) Nid yw person yn darparu gofal dydd pan fo'r person yn darparu gwasanaeth ieuenctid i blentyn sydd wedi cyrraedd 11 oed, a phan fo unrhyw ofal a ddarperir yn gysylltiedig â darparu'r gwasanaeth ieuenctid hwnnw.

(2) Yn yr erthygl hon, ystyr “gwasanaeth ieuenctid” yw gweithgaredd o fath a restrir ym mharagraff (3).

(3) Y mathau o weithgareddau yw'r rhai—

- (a) sy'n annog, yn galluogi neu'n cynorthwyo plentyn sydd wedi cyrraedd 11 oed i gymryd rhan yn effeithiol—
 - (i) mewn gweithgareddau hamdden;
 - (ii) mewn addysg a hyfforddiant;
 - (iii) ym mywyd eu cymunedau, a
- (b) pan na fo'n ofynnol i'r plentyn dalu i gymryd rhan mewn gweithgaredd o'r fath, neu pan

(1) 2002 (p. 32).
(2) 2021 dsc 4.

fo'n ofynnol iddo wneud taliad nominal yn unig i wneud hynny.

Gwasanaethau ieuenctid wrth bontio

19.—(1) Nid yw person yn darparu gofal dydd pan fo'r person yn darparu gwasanaeth ieuenctid wrth bontio i blentyn sydd wedi cyrraedd 10 neu 11 oed, a phan fo unrhyw ofal a ddarperir yn gysylltiedig â darparu'r gwasanaeth ieuenctid wrth bontio hwnnw.

(2) Yn yr erthygl hon, ystyr “gwasanaeth ieuenctid wrth bontio” yw gwasanaeth sy'n darparu cymorth addysgol, personol a chymdeithasol i blentyn wrth iddo bontio o addysg gynradd i addysg uwchradd, a phan na fo'n ofynnol i blant sy'n cymryd rhan dalu am y gwasanaeth, neu pan fo'n ofynnol iddynt wneud taliad nominal yn unig am y gwasanaeth hwnnw.

Gweithwyr gofal plant

20.—(1) Nid yw person yn darparu gofal dydd pan fo'r person hwnnw wedi ei gyflogi'n weithiwr gofal plant gan berson sydd wedi ei gofrestru i ddarparu gofal dydd o dan Ran 2 o'r Mesur.

(2) Yn yr erthygl hon, ystyr “gweithiwr gofal plant” yw person sydd wedi ei gyflogi o dan yr amgylchiadau sy'n dod o fewn adran 79(3)(m) o Ddeddf 2016(1) i ddarparu “gofal plant” fel y'i diffinnir yn adran 79(3A) o Ddeddf 2016(2).

RHAN 4

Dirymu

21.—(1) Mae Gorchymyn Eithriadau Gwarchod Plant a Gofal Dydd (Cymru) 2010 wedi ei ddirymu(3).

Darpariaeth drosiannol

22.—(1) Pan fo person a oedd, yn union cyn i'r Gorchymyn hwn ddod i rym, yn darparu gwasanaeth ond a oedd wedi ei esemptio rhag y gofyniad i gofrestru oherwydd bod y gwasanaeth yn dod o fewn eithriad a bennir yng Ngorchymyn Eithriadau Gwarchod Plant a Gofal Dydd (Cymru) 2010, yn gwneud cais i Weinidogion Cymru i gofrestru o dan Ran 2 o'r Mesur erbyn ***, nid yw'r person i'w drin fel pe bai wedi gweithredu yn groes i adran 21(1) (dyletswydd

-
- (1) 2016 decc 2. Mewnosodwyd adran 79(3)(m) gan Ddeddf Iechyd a Gofal Cymdeithasol (Cymru) 2025 (dsc 1), adran 18(2)(a)(ii); nid yw'r diwygiad mewn grym eto.
- (2) 2016 decc 2. Mewnosodwyd adran 79(3A) gan Ddeddf Iechyd a Gofal Cymdeithasol (Cymru) 2025 (dsc 1), adran 18(2)(b); nid yw'r diwygiad mewn grym eto.
- (3) O.S. 2010/2839 (Cy. 233).

gwarchodwyr plant i gofrestru) nac adran 23(1) (dyletswydd darparwyr gofal dydd i gofrestru) o'r Mesur yn ystod y cyfnod gwneud cais.

(2) Yn yr erthygl hon, ystyr "cyfnod gwneud cais" yw'r cyfnod—

- (a) sy'n dechrau â'r diwrnod y daw'r Gorchymyn hwn i rym, a
- (b) sy'n dod i ben ar—
 - (i) y dyddiad y mae Gweinidogion Cymru yn penderfynu'r cais i gofrestru, neu
 - (ii) pan fo'r penderfyniad hwnnw yn ddarostyngedig i apêl o dan adran 37 o'r Mesur, y dyddiad y caiff yr apêl ei phenderfynu.

Enw

Dawn Bowden, Y Gweinidog Plant a Gofal
Cymdeithasol, o dan awdurdod Ysgrifennydd y
Cabinet dros Iechyd a Gofal Cymdeithasol, un o
Weinidogion Cymru
Dyddiad